

# Ester

E buki di Ester ta deskribí komo “litratura maestral” i un “tesoro di literatura”. Sin duda, e buki di Ester ta kontené un di e storianan mas fasinante di Beibel. Ma e storia no ta solamente interesante; e ta un storia importante. Talbes nos por pensa ku esaki ta un storia ku ta enfatisá un òf otro punto étiko importante. Ma e ta muchu mas ku esei.

Kuater persona ta destaká den e buki aki: Asuero (rei di Persia), Haman (enemigu di hudiunan), Mardoqueo (esun ku a bira lider di hudiunan), i Ester (e yùfrou ku a bira reina. Sin duda, Ester ta e persona ku ta destaká den e buki. Hustamente e buki ta karga su nòmber, pasobra henter e drama ta lora rònt di su persona. Esaki ta solamente e di dos buki di Beibel ku ta karga nòmber di un hende muhé. E otro ta e buki di Ruth. Tambe esaki ta e úniko buki di Beibel ku tur e akshon ta tuma lugá na Persia.

E susesonan den e buki di Ester ta tuma lugá despues ku e hudiunan a haña libertat pa regresá na nan mes pais despues di eksilio na Babilonia. No tur hudiu a bolbe. Ester 9 ta indiká ku hopi hudiu tabata den diferente provisoria di Media-Persia. Mardoqueo i Ester tabata dos di nan.

E storia den e buki di Ester ta konta kon e puebel hudiu a evitá di wòrdu destruí dor di kurashi di un solo dama hudiu. Kiko lo a sosodé si e puebel hudiu a wòrdu likidá sinku síglo prome ku Hesus mester a nase? Esei lo a kambia totalmente e historia di mundu i destino di hende. Lo no tabatin un nashon di Israel, Jerusalèm lo no a wòrdu rekonstruí, e Mesias lo no a nase, i tur hende na mundu lo ta pèrdí den nan pikánan ketu bai. E beyesa hudiu, Ester, no tabata sa kon importante su kurashi tabata. Ester su akshon a hunga un ròl sumamente importante pa ku binida di e Salbador!

## I. HISTORIA RELASHONÁ KU E BUKI

E impero di Babilonia a wòrdu konkistá i remplasá ku e impero Medo-Persia (539-331 B.C.) E rei, segun buki di Ester, tabata Asuero. El a reina di 486 pa 465 B.C. Arkeologonan a deskubrí ku nòmber di un yu di Dario e Grandi tabata KSHAYARSHA. E nòmber aki, tradusí na griegu ta Xerxes. I tradusí na idioma hebreo ta Asuero. Pues, studiantenan sekular di historia konosé Asuero komo Xerxes I. Nos lo usa tur dos nòmber—ma e ta e mésun persona.

For di historia, nos ta deskubrí algu tokante karakter di Xerxes. Loke historia ta konta di su persona ta kuadra ku loke Beibel ta bisa di dje. Historia ta laga sa ku e tabata gusta fiestanan di bebementu, regalonan luhoso, e ta bira loko di rabia, un hòmer sensual. Komo rei, Xerxes a traha un brùg riba botonan ku ta flota na Hellespont. Nèt despues ku e brùg a keda kompletá, un tempestat a destruí. Xerxes tabata asina rabiá ku el a duna òrdu pa zuip laman 300 biaha. Ademas, el a tira dos kadena den laman, anto a kap kabes di esnan ku a konstruí e brùg.

Na un okashon, Pitius a regalá Xerxes un suma hopi grandi pa yud’è ku su guera. Xerxes tabata asina kontentu ku Pitius pa su lealdat ku el a debolbé e plaka i a dun’è un regalo. Poku tempu despues, a mésun Pitius a pidi Xerxes un favor: pa su yu hòmer mayor por keda kas i kompañ’e den su biehes na lugá di bai guera. Xerxes a rabiá asina tantu ku el a duna òrdu pa kòrta e yu na dos pida i a pone su ehersito marcha meimei di e kadaber separá.

Xerxes tabata un hòmbler razu i loko, un hòmbler di ekstremonan. Nos por komprende mihó dikon tabata asina peligroso pa Ester aserká rei sin wòrdu invitá (4:11,16). Nos por komprende mas mihó mentalidat di rei Asuero ku a duna Haman pèrmit pa mata tur hudiu, sin buska pa sa ken e puebel ta ku Haman tabata ke mata. Nos por komprende tambe dikon rei Asuero a pèrmití nèt lo kontrario pa sosodé despues ku e komplòt di Haman a sali den klaridat—esta ku el a pèrmití pa e hudianan mata nan enemigunan. (For di un ekstremo pa otro.) Pa rei Asuero ta parse ku bida tabatin poko balor!

Hamanta yama e “agagita” (3:1). Algun studiante di Beibel ta pensa ku esaki ke men ku e ta desendiente di rei Agag ku Samuel a mata, segun 1 Samuel 15. Ma tambe tin e pusibilidad ku Haman tabata habitante di un distrito den Impero di Persia ku tabata yama Agag.

Talbes Ester a yuda hasi e eventonan deskribí den e bukinan di Esdras i Nehemias pusibel. Su matrimonio ku rei di Persia a dun’é un puesto di onor. Kisas, pa motibu di influensia di Ester, e rei di Persia a duna e hudianan pèrmiso pa regresá na nan mes pais huntu ku Esdras. Pusibelmente, Ester a hasié pusibel pa Nehemias sirbi den palasio di e rei di Persia, i eventualmente bira gobernado di Jerusalèm. (Ta interesante ku Nehemias 2:6 ta menshoná “reina sintá banda di” rei. Algun estudiante di Beibel ta pensa ku e reina ei tabata Ester.)

## II. E PERSONA PRINSIPAL DI E BUKI

Ester no tabata nòmber bèrdadero di e persona sentral di e buki. Segun Ester 2:7, Hadasa tabata su nòmber hebreo. Ester lo tabata su nòmber persiko, nifikando “strea”. Tabata kustumber di e konkistadónan di hudianan pa duna nan katibunan nòmbernan pagano, manera a sosodé ku Daniel i su tres amigunan (Daniel 1:7).

Ester tabata un huerfano hudiu. Despues ku su mayornan a fayesé, su primo, Mardoqueo, a tum’é komo su yu di kriansa. E tabata di e tribu di Benjamin, talbes famia di tata di rei Saul, Kis (2:5). Mardoqueo lo tabata un empleado di rei. E teksto ta bisa ku Mardoqueo a “*sinta na porta di rei*” (2:19,21) i e tabata entre e sirbidonan di rei segun 3:2.

Nan a biba na Susa. E stat aki tabata e palasio-habitashon di reinan di Persia durante tempu di frieldat. E tabata lokalísá 360 kilometer distansia pariba di Babilonia.

## III. FECHA DI E BUKI

Ta parse ku Asuero a muri promé ku e outor a skirbi e buki (10:3). Xerxes a wòrdu asesiná na aña 465 B.C. Pues, e buki lo a wòrdu skirbí despues di e fecha ei.

Kandela a destrui palasio di Xerxes durante reinado di Artaxerxes I. Outor di e buki ta demonstrá ku e tin bon konosementu di e palasio. Ta improbabel ku e buki a wòrdu skirbí despues di destrukshon di e palasio.

Algun teólogo liberal ta argumenta ku e buki a wòrdu skirbí durante era di e makabeonan (166-63 B.C.). Ma no tin ningun evidencia di influensia griego den e buki, algu ku sigur lo tabata e kaso despues di e konkistanan di Alexander e Grandi na añanan 331-330 B.C.

Ta parse ku e outor lo mester a skirbi e buki promé ku e fecha ei. Pues, nos ta yega na e konklushon ku e buki lo a wòrdu skirbí entre 450 i 350 B.C., i sigur no mas despues.

## IV. OUTOR DI E BUKI

Ken a skirbi e buki di Ester? Echu ta ku nos simpelmente no sa. Ma tòg tin diferente pusibilidad. Nòmber di Nehemias, Esdras, Joakin, hòmblernan di e Gran Snua ta presentá komo pusibilidad. Ma e evidencia ta skars. Ta lógiko pa pensa ku Mardoqueo a skirbi e buki. E surgenesia ei ta harmonisá ku tradishon hudiu.

Maske Mardoqueo ta un bon pusibilidad, e buki tambe ta presentá algun interogante si Mardoqueo tabata e outor. Por ehempel, 10:2-3 ta duna impreshon ku Mardoqueo ya kaba tabata morto ora e buki a wordu skirbi. I Mardoqueo probabelmente lo no a skirbi di su mes bondat,

loke ta mensioná den 10:3. Di otro banda, ta pusibel ku Mardoqueo a skirbi e storia (kapítulonon 1-9), i un otro persona a agregá kapítulo 10 komo epílogo despues di Mardoqueo su morto.

Di tur manera, nos sa ku e outor sigur tabata un hende bon na altura di detayenan di bida i kultura di Persia. E tabata konosé e palasio na Susa bon (1:5; 2:11,21; 7:8) i tambe etiketa den palasio (1:6-8; 4:11; 8:11-17). E tabatin informashon ku solamente Mardoqueo òf Ester por tabatin. I sigur e tabata un hudiu patriotiko.

Tambe ta obvio ku e outor a hasi uso di diferente otro dokumento pa skirbi e buki. Sigur el a sita e buki di krónikanan di e reinan di Media-Persia (2:23; 6:1; 10:2). I segun 9:20, el a hasi uso di e karta di Mardoqueo.

## **V. PROPOSITO DI E BUKI**

Kiko tabata proposito di outor di e buki di Ester? Pakiko el a skirbi e buki?

### **A. PA MUSTRA KON DIOS A PROTEHÁ E HUDIUNAN DEN EKSILIO**

Pasobra e puebel di Dios a hasi piká, El a manda den eksilio pa setenta aña. Durante e tempu ei, nan tabata biba entre nashonnan pagano. Algun tabata hostil pa ku hudiunan. Ma Dios a protehá nan—méskos ku El a protehá nan di Faraon na Egipto, den desierto huntu ku Moisés, for di diferente ehersito ku a invadí nan tera, èts.

Ta interesante ku Dios no ta mensioná ni un biaha den henter e buki di Ester. Ma ta obvio ku e buki ta ilustrá klaramente ku apesar di tur e maldat ku enemigunan pagano por plania kontra e hudiunan, Dios, den Su soberania, ta libra i protehá Su puebel. Esaki ta un punto hopi importante pa ku hudiunan.

Ta notabel ku ningun milager ta tuma lugá den e buki. Ma no tin duda ku henter e buki ta un demonstrashon di e obra soberano di Dios, sin ku El a hasi algu kontrario di e reglanan natural di bida. Di berdat por bisa ku henter e storia ta un milager grandi, sin ku Dios a hasi uso di milager.

Den e promé sinku kapítulo di e buki, kuminsando ku eventonan ku ta parse no tin afekto riba puebel di Dios, kos ta bai di malu pa pió pa e hudiunan. Dios ta keda invisibel. Ma e último sinku kapitulo ta mostra ku maske Dios tabata invisibel, Su puebel no ta invisibel p'E. E ta mira i ta aktua. I ta sali na kla ku di bèrdad, añanan promé ku e eventonan trágiko a sosodé pa e hudiunan, ya kaba Dios a prepará e solushon. Dios a krea un mucha muhé hudiu asina bunita ku e tabata esun ku rei Asuero a selektá...promé ku e problemannan a kuminsá pa e hudiunan.

No tabata pa kasualidat ku Ester a bira reina. No tabata pa kasualidat ku Mardoqueo a tende di e plan pa asesiná rei. No tabata pa kasualidat ku rei Asuero a lubidá pa rekompensá Mardoqueo pasobra el a spar su bida. No tabata pa kasualidat ku Asuero no por a drumi i el a lesa loke Mardoqueo a hasi. No tabata pa kasualidat ku Haman a bin pidi favor di rei nèt tempu ku Asuero tabata pensa kon e por rekompensá Mardoqueo. Nada a sosodé pa kasualidat. E eventonan ta sosodé pasobra Dios ta soberano!

Nos por mira e obra di Señor den e buki di Ester. Méskos ku Dios a duna Hose un puesto haltu na Egipto pa e por skapa bida di su puebel, méskos ku Dios a duna Daniel e puesto na Babilonia, igualmente El a pone Ester i Mardoqueo den puesto pa nan por spar bida di e puebel hudiu na Persia.

Nos tambe por tin e siguransa den nos bidanan ku Dios tin un proposito pa loke ta sosodé. No ta pa kasualidat òf pa suerte. Dios ta muchu sabí pa kiboká. Dios ta muchu amoroso pa plania algu ku no ta pa nos bon (Romanonan 8:28).

### **B. PA MUSTRA ORIGEN DI E FIESTA DI PURIM**

E palabra “Purim” ta bin di e palabra “Pur” ku ta nifiká, lòt. Haman a tira lòt pa mira ki dia lo ta e mihó dia (di suerte) pa likidá e hudiunan (3:7). E lòt a kai (3:7,13) pa dia 13 di e luna hudiu Adar (durante nos luna di febrüari òf mart).

Segun lei di Persia, rei no ta pèrmití pa revoká su dekreto (8:8; Daniel 6:15). Ma reinan perso tabata pèrmití pa hasi un otro dekreto pa kontra arestá e daño di e promé dekreto. Pues, ora e hudiunan a haña sa di e di dos òrdu ofisial—dunando nan libertat pa defendé nan mes riba e dia ei—nan enemigunan tabata koutiloso pa ataká e hudiunan. E siguiente dia, e hudiunan a haña pèrmiso pa ataká nan enemigunan i nan a mata 75.000 (9:16). Pasobra e dia di destrukshon a bira un dia ku hudiunan a hana viktoria riba nan enemigunan, e dia aki a bira un dia di fiesta, ku e nòmber Purim (9:24,26).

### **C. PA SIGURÁ E HUDIUNAN KU NO A REGRESÁ KU DIOS TA STIMA NAN**

Durante era di Ester, algun hudiu ya kaba a regresá na e Tera Priminti ora emperadó Siro a duna nan nan libertat. Ma otronan no a bolbe na nan tera. E buki di Ester ta komuniká kla ku Dios ainda ta stima nan i ta kòrda riba nan. E lo protehá nan di opreshon inhustu maske nan ta leu fo'i kas. E buki di Ester ta siña ku Dios ta kuida Su puebel.

## **VI. STRUKTURA DI E BUKI**

Lo siguiente ta un pusibel struktura pa e buki di Ester:

- I. Fiesta di Asuero i divorso di Vasti – 1:1-22
- II. Seleksion di Ester komo reina – 2:1-23
- III. Haman su komplòt pa destruí Mardoqueo i e hudiunan – 3:1-15
- IV. Mardoqueo ta persuadí Ester pa intervení – 4:1-17
- V. Ester su petishon eksitoso na e rei – 5:1-7:10
- VI. Kaída di Haman i salbashon di hudiunan – 8:1-9:16
- VII. Fiesta di Purim – 9:17-32
- VIII. Konklushon: e prominensia di Mardoqueo – 10:1-3

## **VII. OPSERVASHONAN DI E BUKI**

Nos por nota diferente punta relashoná ku e buki:

### **A. KRONOLOGIA**

Laga nos pone e buki aki den un perspektiva kronológiko. Esaki por yuda nos mira e man di Dios den historia. Nota e siguiente fechanan:

- E promé grupo di hudiu a regresá na Jerusalèm for di Babilonia – 538 B.C.  
Esaki a tuma lugá bou guia di Zorobabel—deskribí den Esdras 1-6.
- E hudiunan a bolbe konstruí e tèmpel na Jerusalèm - 536-516 B.C.
- Ester a bira reina di Persia – 478 B.C.
- Ester a salba e hudiunan for di matansa – 473 B.C.  
Haman a inventá su plan pa likidá e hudiunan 11 luna despues.
- Di dos grupo di hudiu a hasi su viaha di Babilonia pa Jerusalèm – 458 B.C.  
E eventonan aki ta deskribí den Esdras 7-10. Esdras tabata nan lider.
- Nehemias a bolbe i a konstruí murayanan di Jerusalèm – 444 B.C.

Si e fechanan aki ta korekto, nos por ripará ku Ester a bira reina mas òf ménos 60 aña despues ku e hudiunan a regresa na Jerusalèm i kuminsá konstruí e tèmpel. Tambe nos ta nota ku e eventonan deskribí den e buki di Ester a tuma lugá promé ku e eventonan di Esdras 7-10 i Nehemias. Ester a bira reina di Persia 30 piku aña promé ku Nehemias a regresá na Jerusalèm i rekonstruí e murayanan.

E buki di Ester ta duna diferente fecha ku por yuda nos komprendé e storia mas mihó. Lesando e storia sin paga tino na e fechanan ku e buki ta duna, nos por haña impreshon ku e eventonan a sosodé un tras di otro. Ma en realidat, e storia ta tuma lugá durante un periodo di un dékada (483-473 B.C.). Nos por mira e man di Dios obrando tur e tempu ei.

Un di e batayanan importante den historia a tuma lugá entre Gresia i Persia. Xerxes I, rei di Persia, a bringa kontra Gresia na año 480 B.C. Algun tempu promé ku e bataya, e bankete deskribí den kapitùlo 1 di Ester a tuma lugá, talbes na año 482 B.C. Ta parse ku meta di e bankete ei tabata pa Xerxes por a konsultá ku e hòmbènan prominente di su reino tokante su plan pa bai guera kontra Gresia. Komo resultado di e bankete aki, Xerxes a deshasí di Vasti komo reina despues ku el a nenga eksponé su kurpa dilanti e hòmbènan presente ku probabelmente tabata burachi. Ester 1:3 ta bisa bon kla ku esaki a tuma lugá “*den e di tres año di su reinado*”.

Despues di e bankete, e guera a tuma lugá i Gresia a derotá Persia den e batayanan famoso na Termopaliae i Salamis (480 B.C.). Ester 2:1 ta inisiá ku e palabranan, “*Despues di e kosnan aki, ora rei Asuero su rabia a baha...*” Probabelmente, “*Despues di e kosnan aki...*” ta referi na mas ku e eventonan deskribí den kapitùlo 1. E palabranan aki ta mas bien referí na su rabia despues di su frakaso den guera kontra Gresia. Pues, despues di pèrdè e guera kontra Gresia, Xerxes a buska un otro reina. E lo a kasa ku Ester na año 478 B.C.—“*den e di shete año di su reinado*” (2:16).

Tabata sinku año despues ku Ester a bira reina ku e eventonan di kapitùlonan 3-9 a sosodé. Haman a bin ku su komplèt pa mata e tur hudiù “*den e di diesdos año di rei Asuero*” (3:7)—473 B.C. Esei lo tabata na luna di mart òf aprel. Segun 3:7 ta sigui konta, “*lòt a wòrdu tirá dilanti di Haman, pa keda dia i pa kada luna, te na e di diesdos luna, esta, luna di Adar.*” Haman a tira lòt (talbes nan a usa algu manera dou) pa determiná kua fecha lo tin mas suerte pa e matansa sododé. E fecha determiná tabata diesún luna despues—na luna di febrüari òf mart.

Ester a revelá a komplèt na rei. Mardoqueo a laga skirbi un otro dekreto pa hudiunan defendé nan mes i mata nan enemigunan “*den e di tres luna (esta, luna di Sivan), riba e di bint’i tres dia*” (8:9). Pues, Mardoqueo a saka su dekreto dos luna i dies dia despues di e dekreto di Haman (na luna di mei òf yüni).

Xerxes a wordu asesiná diestres año despues ku Ester a bira reina—na año 465 B.C. Ester sigur lo tabata hopi mas hóben ku Xerxes, i—huntu ku Mardoqueo—lo a influensí e impero di Persia pa hopi año.

## **B. OUSENSIA DI DIOS DEN E BUKI**

Nos a mira kaba ku e buki di Ester no ta menta nòmber di Dios ni un biaha. Asta rekordatorionan di Dios no ta presente den e buki. Por ehèmpel, lei di Dios no ta mensioná; tampoko sakrifisionan, Jerusalèm, temple, adorashon òf orashon (maske yunamentu si ta mensioná).. E echu aki a pone hopi studiante di Beibel duda ku Ester mester forma parti di Beibel. Martin Luther, por ehèmpel, a ekspresá su preferensia ku e buki no a eksistí mes.

Un pregunta ku ta lamta ta pakiko ningun teksto den e buki ta mensiona Dios? Nos tin ku bisa onestamente ku nos no sa sigur. Ma studiantenan di Beibel ta proponé algun pusíbel motibu:

1. Pasobra e outor a skirbi e buki pa tantu hudiunan komo paganonan di Persia lesa, pesei e no a mensioná Dios.

2. Pusíbelmente e buki no ta mensioná Dios pasobra el a wòrdu kopiá for di relatonan ofisial di Persia.

3. Kisas Dios no ta mensioná pasobra e outor tabata ke pa e buki forma parti di e relatonan ofisial di rei di Persia.

3. Dios a manda e hudiunan den eksilio pasobra nan relashon ku Dios tabata kibrá. E outor a nenga menta nòmber di Dios pa demonstrá e kiebro ei. (Ora Esdras i otro hudiunan a bolbe na e Tera Priminti, hopi hudiù a nenga bolbe, preferando pa keda biba serka paganonan i nan diosnan.)

4. Talbes e outor no a mensioná Dios pa enfatisá ku Dios ta soberano, maske E ta aktua na un forma invisibel.

Si Dios Su nòmber lo a wòrdu inklui pa splika loke a sosodé, esei lo a debilita e buki. Komo ku Su nòmber no tei, e lektor ta realisá ku Dios ta soberano maske ku E ta invisibel. E ta

usa hende apesar di nan boluntat liber sin interumpí asuntonan humano na un manera obvio, pa kumpli ku Su proposito!

Nos tambe mester bisa purá, ku maske e nòmber di Dios no ta aparesé den e buki, ta masha visto ku Dios ta presente i ta aktua! Henter e buki ta mostra ku Dios tin kontrol riba sirkunstansianan di bida. Klaramente E ta pone e persona korekto ta na e lugá korekto na e tempu korekto. Esei no ta sosodé pa suerte òf pa kasualidat—tin un Dios ku ta kontrolá esei!

Talbes 4:14 ta komuniká indirèkt ku Dios ta soberano. Dios a priminti ku E lo proteha Su puebel. Mardoqueo a bisa Ester, “Si bo no ta hasi algu, Ester, Dios (ta e implikashon) lo sòru pa kumpli ku Su proposito pa medio di un otro persona.” Sin duda esaki ta demonstrá konfiansa den un Dios soberano!

E personan a konsiderá nan rei divino. Segun 3:2, rei a duna òrdu pa tur hende bùig te na suela pa Haman tambe. Mardoqueo, ku konvikshon ku e mester bùig solamente pa Dios, a nenga hasi esei.

I yunamentu (4:3,16; 9:31) ta duna implikashon ku tin un Ser Dibino. Yunamentu i orashon ta bai huntu. No tin motibu pa yuna i hasi orashon si Dios no t’ei.

### **C. HUDIUNAN**

Nos ta kòrda ku despues di reinado di Salomon, Israel a bira dos pais. E reino di nort (ku dies pa diesun tribu) tabata konosí komo Israel. Poblashon di e reino di suit a konsistí prinsipalmente di e tribu di Juda. P’esei e reino ei a karga e nòmber Juda. Pa motibu di nan piká, e habitantenan di tur dos reino a wòrdu plamá.

Algun estudiante di Beibel ta kalkulá ku mas òf ménos 2-3 mion hudiu a biba na Persia i Babilonia durante era di Ester. Ora nan a haña libertat pa regresá na e tera ku Dios a primintí nan, mayoria di esnan ku a regresá tabata di e tribu di Juda. Komo resultado e palabra “hudiu” a wòrdu usá pa hende di tur diesdos tribu. (Origen di e palabra “hudiu” ta “Juda”.) “Hudiu” òf “hudiunan” ta mensioná mas ku sinkuenta biaha den e buki di Ester.

Talbes e eventonan deskribí den e buki di Ester a motivá algun hudiu pa regresá na nan mes pais. Te awe, hudiunan ta selebrá e fiesta di Purim riba e di 14 òf 15 dia di Adar (nos luna di febrüari òf mart). Nan ta lesa e buki di Ester na e fiesta aki.

### **D. INTEROGANTE TOKANTE E ÉTIKA DI MARDOKEO I ESTER**

E buki no ta pinta Ester komo un hudiu deboto na Dios. Ta parse ku e tabata despuesto pa skonde su identidat komo hudiu pa e por bira reina. Ta parse ku no a preokup’è ku e ta bai kasa ku un pagano. Ora Haman a roga pa su bida, Ester no a mostra miserikòrdia—i asta a demandá ku Haman su yunan wòrdu hòrká. Despues el a inisiá un matasia serio di parti di e hudiunan.

Nos no ta haña un impreshon positivo di Mardoqueo su santidat tampoko. E ta esun ku a konsehá Ester pa no revelá su identidat pa e por bira reina. El a nenga bùig pa Haman. Mardoqueo tambe a tuma vengansa huntu ku Ester kontra e enemigunan di e hudiunan.

Algun estudiante di Beibel ta defendé i elogiá Ester i Mardoqueo. Otronan ta kondená nan. Ta mas mihó pa nos keda balansá—pa nos no siegamente hustifiká nan ni tampoko totalmente kondená nan.

Nos tin ku kòrda ku Dios a manda e hudiunan den eksilio pa motibu di nan piká (idolatria, adulterio, gañamentu, èts). Mardoqueo i Ester ta reflehá e hendenan aki. Nos no mester pensa ku tur heroé den Skritura tabata hende sin piká. Samson, Gedeon, David, èts ta ehèmpelnan di hende ku tambe a faya. Ademas, nos no mester pensa ku e akshonnan di Mardoqueo i Ester tabata inspirá pa Dios pasobra nan storia ta den un buki inspirá. Esaki ta un relato onesto di hende ku ta pekadó méskos ku nos. (Nos no sa kon nos lo reakshoná si nos tabata persiguí i a wòrdu librá!)

Dios a obra apesar di frakaso! Su gracia ta obvio den e buki! E echu ku Dios a protehá e puebel hudiu no ta komuniká ku Dios a aprobá di nan bidanan.

Ma laga nos pensa di algun pusibilidat di otro banda. Algun ta haña ku e orguyo di Mardoqueo ta e kousa di tur e problemanan ku e hudiunan a haña nan mes aden. Ma ta probabel ku Mardoqueo lo a rekonosé Haman komo un dios si el a bùig. Tambe ta pusíbel ku Ester a hañ'é obligá pa djòin e kompetishon di beyesa...ku e no tabata algu boluntario. Nos tambe tin ku pensa si tabatin otro manera pa e hudiunan skapa di ser likidá. Si Mardoqueo i Ester a pordoná tur esnan ku tabata ke mata nan, talbes e hudiunan lo a bira nan víktimanan.

### **E. LOKE E BUKI TA SIÑA NOS**

Algun hende ta bisa ku pasobra Dios no ta menshoná den e buki di Ester, ku e no tin balor teológiko. Ma esei no ta bèrdat. Ester 4:14 ta laga sa ku Dios tin Su proposito i E lo kumpli ku esei di un òf otro manera. E lo usa un òf otro persona pa kumpli ku Su proposito.

Ester tambe ta siña ku tin konsekuensia pa piká. Tambe e ta laga sa ku fieldat eventualmente lo wòrdu rekompensá. Ademas nos por siña for di e buki ku ta bal e la pena pa para firme pa nos konvikshonnan—asta den situashonnan peligroso.

## **Literatura Konsultá**

- Archer, Gleason L. Jr. *A Survey of the Old Testament Introduction* (Chicago: Moody Press, 1994), p. 425-429.
- Baxter, J. Sidlow. *Explore the Book* (Grand Rapids: Zondervan Publishing House, 1960), vol. 2, p. 257-285.
- Demaray, Donald E. *A Layman's Guide to Our Bible* (Los Angeles: Cowman Publishing Company, 1964), p. 91-92.
- Halley, Henry H. *Halley's Bible Handbook* (Grand Rapids: Zondervan Publishing House, 1964), p. 222-223.
- Hill, Andrew E. & Walton, John H. *A Survey of the Old Testament* (Grand Rapids: Zondervan Publishing House, 1991), p. 238-243.
- Huey, F. B. Frank E. Gaebelin, ed. *The Expositor's Bible Commentary* (Grand Rapids: Zondervan Publishing House, 1988), vol. p. 775-796.
- Jensen, Irvin, L. *Jensen's Survey of the Old Testament* (Chicago: Moody Press, 1978), p. 241-249.
- MacArthur, John. *MacArthur's Quick Reference Guide to the Bible* (Nashville, TN: W Publishing Group, 2001), p. 77-80.
- Unger, Merrill F. *Unger's Bible Handbook* (Chicago: Moody Press, 1967), p. 264-266.
- Wright, J.S., Merrill C. ed. *The Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 2, p. 376-380.